



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**16. Kalenderwoche – ab 16. April 2011**

## De Friehlingsjagge

Bloß weil nu jedzde bledzlich Friehling is, hab isch Ärschor weeschn meinor Gledasche! De digge, gefiddorde Jagge is jedzde zu digge. Die is ehm ooch fiehr eisischn Windor un Schneeschdurm gedachd. Nu is fasd Friehling, da kannsde die nisch mähr anzieh'n, wensde nisch off mobile Sauna machn willsd. Also habsch im Schrank de Friehlingsjagge rausgesuchd. De blaue! Se is ooch noch da gewähsn. Isch hab se gefundn! Obwohl se sisch guhd vorschdeggd hadd. Se hing unnor eenor aldn Anzuchjagge, die isch schon ewisch nisch mähr angehabbd hab. De Hose zu dähr Anzuchjagge had schon lange das Zeidlische gesächned! Währ nu de Friehlingsjagge unnor de vorwaisde Anzuchjagge gehängd had, habsch nisch rausgegrischd. In Frache dud da ja eh bloß meine Gudste komm, abor die had das abgeschdriddn. Was dudn misch deine Jagge angehn, hadse gesachd. Na, weeschn mir. Egahl - isch hab se ja gefundn gehabd, de Friehlingsjagge.

Nu hab isch se bei dor näschs'dn Geleeschnheed ooch angezochn. Se is mir sähr schnell widdor vordraud un symbhadisch vorgekomm. Drodz dass mor uns fasd e halbes Jahr nisch gesähn haddn. Se had ooch noch ieborall gebassd. Un in eenor Dasche hab isch sogahr zur Belohnung e Zweek-Euro-Schdigge gefundn! Nu konnde dor Friehling also komm - de Jaggnfrage war erfolschreich gelesd! Abor da hadde isch de Reschnung ohne meine Gudste gemachd: Die alde Schabragge kannsde nisch mähr anzieh'n! - hadse gesachd. Siehd aus wie eene Bfärdedegge!

Isch hab ershdema nisch droff reagierd. Wie isch das immor ershdema mach, wenn meine Gudste an mir rummeeggorn dud. Villeischd war ja de Friehlingsjagge doch noch fiehr een Friehling zu reddn? Abor nee, meine Gudste had keene Ruhe gegähm. Jedsma wenn isch de Jagge anhadde, hadse angefang rumzumäkn. Abgewedzd! Aldmodisch! Ausgebeuld!

Da hab isch se dran erinnord, dass ja gesachd hadde, dass meine Jagge ihr nischd angehn däde. Da hadse gesachd, ja, abor wenn mir zusamm rumloofn, will se sisich mid mir nisch schäm missn!

Glaror Fall - die Jagge war nisch mähr zu reddn. Nu will isch nisch daderdriebor erzähl, wie misch nu meine Gudste dursch de Herrenabteilungen von vorschiedne Gaufheisor gedriehm had... - Jagge an, Jagge aus... Jagge an, Jagge aus... eene war zu Kleen, de annre zu deuor... am Ende hädde isch fasd eene gehabbd, die war subormodern. Von so eenor ganz beriehmdn Marge - Heinz Müller odor Goddfried Bohne odor so was ähnliches! Abgewedzd! Aldmodisch! Ausgebeuld!

Fasd wie meine alde Friehlingsjagge, bloß ehm neu un had fasd dreihunnord Euros gekosded!

Beim Anrobiern habsch da mein Bauch rischdisch offgeblähd, woderdursch dähr Gelsch... also, die Jagge an mir vorbeigegang is. Zu enge! Bei dor näschsdgreeßoren Greeße habsch dann dähn Bauch eingezohn, woderdursch die ooch widdor nisch gebassd had. Zu groß!

Jedzde had meine Gudste eene Jagge ausm Gadaloch beschdelld. Isch bin geschbannd, wann isch offgähm du. Dähn längoren Adem had ja eh meine Gudste. Nisch bloß bei Jaggn!

**Eduard Sachsenmeyer**